

L-cornie tel Lázaro

1. Tilcet il-šitvie mfárise u canta l-sayf faði
smacu ašşik kam il-Lázaro u rijce ɣalf mill Aði
2. L-riɣe kantír il-déɣinna u l-ruɣ kant mplane farɣa
Ntɣawšu jumpi minxók minni tantsalli aði l-varka
3. Ttapti alok takuyθkon u ftaxu kaes δanekon
Tattácirfu ayšo ta sar ta má kiščú canekon
4. L-Lázaro kanyaɣlak mnaxxóst il-Viθania
Kallú ɣnayn pnatukya ɣvat il-Marθa u l-Maria
5. L-Lázaro miski ɣal i-ɣpir u má tavel temut
u xvatu necipnu xnayton u tlaffu xost il-sut.
6. Lli-Mpsix kan cep pcit i-ɣtir fi eɣte oɣre Mtine
Ma l-Apostolus ta kallú u ma caripe oɣre tinye
7. Xapár šikutši má kallú lli-Mpsix mpšan lli-rfik telu
Ost ta ɣilkúɣ lli-ɣnayn ɣvat tilpullu “jru u elu”
8. Marθa jirket sop illi-Mpsix ɣiðnit u kantiɣpillu
Xamnet u vakcet ɣost illi-jreɣ ma tnuvox kantaɣkillu
9. **(Marθa)** Kifta má kunt anaɣxullá ya Rabbí tatsacitu
Pácaref kif rfikak kantecíš an kunt axxulla cintu.
10. **(Maria)** U alok int amma pitrí mil Rabbi tlop tesacet
Mil mawt terajɣu ɣalf , tekúm mi ta kan maet...
11. **(Mpsix)** Men pisaddíkinni aš fkul mawt má lu fi l-cištu
Ttekumu ɣok il-maytín, aða pitsaθku intu?
12. **(Marθa u Maria)** Mantsaddek u ttancaet štit, tattismca l-tinye kulla.
Int illi-Mpsix tel Rabbi lli-ipn, pitríz il-tinye kulla.
13. **(Mpsix)** Alok lli-rfiki l-Lázaro, kúlunni ayn uo?
Xútunni jump mpšan tákišču u teismácani vuo.

14. Meşkin illi-xnayn tacantu kintam kanu Marθa u Maria
u xalfon meşi kan lli-Mpsiḫ u xilku l-Viθania.

15. U kallon alok illi-Mpsiḫ l-xajra tekaymua
teiftax il-kapr tel Lázaro l-vasie teisemcua

16. Caet illi-Mpsiḫ ma xiss i-ştit u fi l-nuss ntşakket l-xajra
«Kom xok u mpşi ya Lázare u páninna alok parra»

17. Mpşik il-parke kam il-Lázaro, parra tilce mil kapru
mill Ađi rijce mi ta kan il-Rabb savallu xatru

18. **(Kullon ill-ulát)** Kuynna Lázare, aş kşacat fi l-oḫre l-tinye ta ukacat?

19. **(Lázaro)** Rayt fazca, rayt pike, rayt vajca u δulme mcike
Tuni fitte moe taşrap, ll-okít tantfi ta pittaxrak

20. U kallon alok illi-Mpsiḫ teḫullu jreḫu u teḫu
U xarap vaḫtu mpşan terúḫ telaki rfaku u ll-eḫlu

21. Aşka ma kanu aḫḫullá kişcu aş sar u saδku
l-Rabb kullon kanyişikru mpşan l-θamma kanyaxku...!!!

22. Snin ḫtir tatcişu kuyθkon u intu u ulatkon
l-Catra şaytna u lli-Mpsiḫ tesallu kullu mpşankon
u l-Lázaro l-kaddís teintor ill-ulatkon